



Naaja Nathanielsen
Inuit Ataqtigiit

§ 37 naapertorlugu apeqqummut nr. 2011-228-mut akissut

Asasara Naaja Nathanielsen

Apeqqutinnut qujanaq.

Aallarniutigalugu paasissutissiisutigissavara annersaasarneq tamaat ataatsimut isigalugu pinaveersaartitsinissaq killilersuinissarlu kissaatigigatsigu annersaasarneq pillugu nuna tamakkerlugu periusissaq piareersarlugu Naalakkersuisut aallartimassuk.

Annersaasartunut katsorsaanissamik neqerooruteqartarnerup killiffia eqqarsaatigalugu Isumaginninnermut Naalakkersuisuusimasup Maliina Abelsenip aammalu borgmesterit akornanni ulloq 17. december 2010-mi ataatsimiittoqarnerani qulequtaq oqaluuserineqarpoq. Allaffissornikkut malinnaasoqatigiit katsorsartinnissamik neqerooruteqartarnermik suliaq ingerlateqqissagaat, taamaattorli suliat aallartinneqarnissaannut ilaqutariinnut sullissiviit nalilersomeqarnissaat utaqqimaarneqassasoq ataatsimiinnermi aalajangerneqarpoq.

Ilaqutariinnut sullissivinnik naliliineq ulloq 24. oktober 2011 tamanut saqqummiunneqarpoq. Taassuma ilaatigut takutippaa ilaqutariinni ilaqutariinnut sullissivinnit sullinneqartuni nakuuserneq annertuumik ajornartorsiutigineqartoq. Aammattaaq naliliinnermi nassuiaatigineqarput nakuuserneq pinaveersaartinniarlugu aamma/imaluunniit sulissutiginiarlugu ilaqutariinnut sullissivinni suliniutit, tassunga ilanngullugit angutit oqaloqatigiittartoqatigiit, inuusuttunut suliniutit, politiinik suleqateqarneq il.il.

Naliliissutip nakuusernermut nuna tamakkerlugu suliniutissamik suliaqarnermut ilanngunneqarnissaa Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoqarfiup sulissutigissavaa, soorluttaaq Pinerluuteqarsimasunik Isumaginnittoqarfimmi katsorsartinnissamik neqeroorutinit misilittakkat ilanngunneqarnissaat pingaaruteqassasoq. Tamatuma saniatigut ilaqutariinnut sullissivinni ilaqutariinnillu katsorsaavinni oqartussaaffiit, tassunga ilanngullugu angutitut arnanullu nakuusertartunut katsorsartinnissamik neqeroorutit ineriartorteqqinnissaat suliniuteqarnermi qitiutinneqassasut.

Nakuuserneq akiorniarlugu suliniutit nukittorsarneqarnissaat pitsanngorsarneqarnissaallu siunertaralugit ilaqutariinnut sullissiviit qimarnguillu

9. dec. 2011
Sagsnr. 2011-058661
Dok. Nr. 773 961

Postboks 260
3900 Nuuk
Tlf. (+299) 34 50 00
Fax (+299) 34 66 66
E-mail: ikinn@nаноq.gl
www.nanoq.gl

qitiusumik ingerlatsivissatut Naalakkersuisunit isigineqarput. Taamaattumik ilaqutariinnut sullissivinnut, ilaqutariinnut højskolinut qimarnguinnullu 2011-mi annertuumik tapiissuteqartoqarpoq. Sumiiffinni arlalinni ilaqutariinnut sullissivinni qimarnguinnilu suliniutit nukittorsarneqarnerisigut ilaqutariinni nakuuserneq pinaveersimatinneqarlunilu sulissutigineqarpoq.

Aammattaaq ilaqutariinnik annertuumik ajornartorsiutilinnik, tassunga ilanngullugu ilaqutariinnik nakuusernermik eqqorneqarsimasunik ikiuussinnaanissamut sulisut piginnaanngorsarneqarnissaat siunertaralugu immikkoortukkuutaarlugu ilinniartitaanermut Naalakkersuisut tapiissuteqarput.

2009/2010-mi ilinniartoqatigiiaat marluk isumaginninnermik suliaqartut sineriatsinni sumiiffinnit tamaneersut pilersinneqarput; isumaginninnermik suliaqartut 22-t ilinniartitaanertik 2011-mi maajimi naammassivaat, 21-llu 2011-mi septembarimi ilinniartitaanertik naammassillugu. Ilinniartitaaneq assut iluaqutaasutut peqataasunit oqaatigineqarpoq, taamaattumillu ilinniartitaanermi immikkoortumik allamik ilanngussinissaq naalakkersuisoqarfimmit sulissutigineqarluni.

Taamaalilluni nakuusertartunut nakuusernermillu eqqugaasunut katsorsartinnissamik neqeroorutit pitsanngorsarlugit Naalakkersuisut maanna ingerlappaat – suliaq pingaarutilik tamanna 2012-imi ingerlateqqinneqassaaq.

Inussiarnersumik inuulluaqqusillunga

Mimi Karlsen